

四庫全書

史部

欽定四庫全書

史部

山西通志卷一百三十一

詳校官給事中臣王鍾健

檢討臣德生覆勘

總校官進士臣朱 鈐

校對官編修臣沈清藻

謄錄監生臣周克鵬

欽定四庫全書

山西通志卷一百三十一

人物

三十

解州

宋

王繼勳陝州平陸人廣順初領汾州刺史充晉磁隰等
州緣邊巡檢歷憲麟石磁四州刺史宋初遷磁州團
練使坐荆罕儒陷降右監門衛率平荆襄權知道州

劉錡屢入寇繼勲上嶺表可圖狀南伐為賀州道行營馬步軍都監繼勲有武勇在軍陣常用鐵鞭鐵槊鐵撾軍中目為王三鐵

司馬池字和中陝州夏縣人晉安平獻王孚後也孤家貲數十萬悉推諸父而自力讀書時開峪口道運鹽池曰昔人何為捨逕而就迂殆必有未便者未幾山水暴至鹽車盡沒舉進士當試殿丘而友匿母亡書池心動夜不能寐曰吾母素多疾家得無有異乎

行至宮城門徘徊不能入友止以母疾告遂號慟而歸後中第授永寧主簿出入乘驢以公事謁令令南向挽令西向論事不少屈歷建德郾縣尉蜀人妄言蠻入寇令閭廷夢松假他事上府主簿稱疾不出池攝縣事會上元張燈縱民遊觀凡三夕民心遂安調鄭州防禦判官知光山縣諸州調竹木期三日池與民自為期約過期不輸者罪之既而輸竹先諸縣盛度薦於朝改秘書省著作佐郎監安豐酒稅徙知小

溪縣河南府辟司錄參軍事尋通判留守司樞密使
曹利用奏為羣牧判官辭不就固授之利用嘗委括
大臣所負進馬價池曰公負尚多不先輸何以趣他
人利用亟命送官數日而諸負者皆入利用貶獨颺
言於朝稱其枉轉對言唐制門下省詔書之出有不
便者得以封還今門下雖有封駁之名而詔書一切
自中書以下非所以防過舉也內侍皇甫繼明兼領
估馬司自言估馬有羨利乞遷官制置使欲附會池

獨不可除開封府推官敕至閤門為繼明黨所沮罷
知耀州擢利州路轉運使知鳳翔府召知諫院懇辭
仁宗謂宰相曰人皆嗜進而池獨嗜退亦難能也加
直史館復知鳳翔疑獄上讞大理輒復下獨承其罪
詔勿劾岐陽鎮巡檢夜飲富民家部卒執之約不敢
復督士卒而後釋其縛池捕首惡誅之巡檢亦坐廢
累遷尚書兵部員外郎兼侍御史知雜事嘗言劉平
好自用而少智謀必誤大事後平果敗更戶部度支

鹽鐵副使上曰是固辭諫官者擢天章閣待制知河中府徙同州又徙杭州轉運使江鈞張從革劾決事不當降知德州而轉運使為姦利或謂池可舉劾以報池曰吾不為也人稱其長者徙知晉州卒

司馬光字君實陝州夏縣人池子生七歲如成人聞講左氏春秋愛之退為家人講自是手不釋書至不知饑渴寒暑羣兒戲一兒登甕足跌沒水中衆皆棄去光持石擊甕破之水迸兒得活後京洛間畫為圖仁

宗寶元初中進士甲科年甫冠聞喜宴獨不戴花同
列曰君賜不可違乃簪一枝除奉禮郎時池在杭求
簽蘇州判官事內外艱毀瘠如禮簽書武成軍判官
改大理評事補國子直講樞密副使龐籍薦為館閣
校勘同知禮院中官麥允言死給鹵簿光言允言近
習臣非有元勲大勞而贈以三公官給一品鹵簿其
視繁纓不亦大乎夏竦賜謚文正言此謚之至美者
竦何可當改文莊加集賢校理龐籍辟通判并州麟

州屈野河西多良田請建築二堡募民耕之可漸紓
河東貴糶遠輸之憂籍從其策而麟將郭恩沒於敵
籍得罪去光三上書自引咎不報籍沒拜其妻如母
撫其子如昆弟時人賢之改直秘閣開封府推官交
趾貢異獸謂之麟光請還其獻又奏賦以諷修起居
注判禮部有司奏日當食故事食不滿分或不見皆
表賀光言不當賀從之同知諫院蘇轍荅制策切直
考官將黜之光言轍有愛君憂國之心不宜黜詔寘

末級諫官范鎮首發國嗣議光在并州聞而繼之且
貽書勸鎮以死爭至是復面言臣昔上三章願果斷
力行上沈思久之曰得非欲選宗室乎此忠言但人
不敢及耳光退未聞命復上疏曰臣向者進說意謂
即行今寂無所聞此必有小人言春秋鼎盛何遽為
不祥之事小人無遠慮特欲倉卒之際援立其所厚
善者耳定策國老其禍可勝言哉上大感動曰送中
書光見韓琦等曰諸公不及今定議異日夜半出寸

紙以某人為嗣則天下莫敢違琦等拱手曰敢不盡力及英宗屢辭命先言辭不貲之富至於旬月其賢於人遠矣然父召無諾君命召不俟駕願以臣子大義責之宜必入英宗遂受命充國公主嫁李瑋詔出瑋衛州母楊歸其兄瑋光又力言上降主沂國待李氏恩不哀進知制誥固辭改天章閣待制兼侍講知諫院時胥史喧譁逐中執法輦官悖慢退宰相衛士凶驚獄不窮治軍卒詈三司使謂非犯階級皆力言

之充媛董氏薨卹典過隆光言古者婦人無謚近制
惟后有之鹵簿本賞軍功未嘗施於婦人唐平陽公
主有舉兵佐高祖功乃得給後令妃主葬日皆給鼓
吹非令典不足法時定封贈法后與妃俱贈三代光
論妃不當與后同袁盎引却慎夫人席正為此耳天
聖親郊太妃止贈二代而況妃乎慈聖光獻后聽政
光上疏曰今攝政之際大臣忠厚如王曾清純如張
知白剛正如魯宗道賢直如薛奎者當信用之猥鄙

如馬季良讒諂如羅崇勲者當疎遠之則天下服濮
議將興即奏漢宣為孝昭後終不追尊衛太子史皇
孫光武上繼孝元亦不追尊鉅鹿南頓君此萬世法
也後詔兩制集議濮王典禮學士王珪等莫敢先光
獨奮筆書曰為人後者為之子不得顧私親宜準封
贈期親尊屬故事稱為皇伯高官大國極其尊榮珪
命吏以手藁為按與大臣意殊御史六人爭之皆斥
光乞留不可遂請與俱貶又言西事生於高宜北事

起於趙滋時方賢此二人故邊臣皆以生事為能漸不可長宜嚴勅邊吏仁宗遺賜直百餘萬光率同列三上章謂中外窘乏不可專用乾興故事不許乃以所得珠為諫院公使錢金以遺舅氏義不藏於家后還政有所取用言當移所屬使立供已乃具數白后以防矯偽曹佾除使相兩府遷官言遷除無名則宿衛將帥內侍小臣必有覬望已而遷都知任守忠等官復爭之因論守忠反覆交構國之大賊乞斬於都

市以謝天下謫守忠為節度副使蘄州安置天下快之詔刺陝西義勇二十萬光抗言其非持白韓琦琦曰使夏驟聞益兵二十萬豈不震懼光曰兵貴先聲為無其實也獨可欺於一日之間耳今吾雖益兵實不可用不過十日彼將知其詳尚何懼琦曰已降勅榜與民約永不充軍戍邊矣光曰民未敢以為然雖光亦不能不疑也琦曰吾在此君無憂光曰公長在此地可也異日他人當位因公見兵用之運糧戍邊

指掌間事耳琦嘿然而訖不為止不十年皆如光憲
王廣淵除直集賢院論其姦邪不可近進龍圖閣直
學士神宗擢翰林學士光力辭上曰古之君子或學
而不文或文而不學惟董仲舒揚雄兼之卿有文學
何辭為對曰臣不能為四六上曰如兩漢制詔可也
竟不獲辭御史中丞王陶以論宰相不押班罷光代
之光言陶由論宰相罷則中丞不可復為臣願俟既
押班然後就職許之遂上疏論修心之要三曰仁曰

明曰武治國之要三曰官人曰信賞曰必罰其說甚備且曰臣獲事三朝皆以此六言獻平生力學所得盡在是矣又言御藥院內臣不復出非祖宗本意因論高居簡姦邪乞遠竄章五上卒出之盡罷寄資者復留二人又力爭之張方平參知政事論其不叶物望不從還翰林兼侍讀學士光嘗患歷代史繁人主不能遍覽遂為通志八卷以獻英宗悅之命置局秘閣續其書至是神宗名之曰資治通鑑自製序授之

俾日進讀詔錄賴邸直省官四人為閣門祇候光曰
隨龍非平日法也閣門祇候在文臣為館職豈可使
廝役為之西戎部將崑名山欲以橫山衆降詔邊臣
招納光上疏極論以為名山之衆未必能制諒祚幸
而勝之滅一諒祚生一諒祚何利之有若其不勝必
引衆歸我不知何以待之不聽百官上尊號光當答
詔言英考親郊不受尊號獻議者謂遼有尊號我獨
無復以非時奉冊昔漢文帝不為大名以夸荒徼願

卒不受此名上大悅手詔獎之執政以國用不足乞
南郊勿賜金帛詔學士議光曰救災節用宜自貴近
始可聽也王安石曰常袞辭堂饌時以為袞自知不
能當辭位不當辭祿且國用不足以未得善理財者
故也光曰善理財者不過頭會箕斂爾安石曰不然
善理財者不加賦而國用足光曰天下安有此理天
地所生財貨百物不在民則在官彼設法奪民其害
乃甚於加賦此蓋桑弘羊欺孝武之言太史公書之

以見其不明耳爭議不已上曰朕意與光同姑以不
允荅之會安石草詔引常袞事責兩府兩府不敢復
辭安石得政行新法光疏其利害邇英進讀至曹參
代蕭何事上曰漢守蕭何法不變可乎對曰寧獨漢
也使三代之君常守禹湯文武之法雖至今存可也
漢武分更高帝約束元帝改孝宣政後竟何如祖宗
之法不可變也呂惠卿言法有一年一變者正月始
和布法象魏是也有五年一變者巡守考制度是也

有三十年一變者刑罰世輕世重是也光言非是光
曰布法象魏布舊法也諸侯變禮易樂者王巡守則
誅之不自變也刑新國用輕典亂國用重典是為世
輕世重非變也且三司使掌天下財不才而黜可也
不可使執政侵其事今為制置三司條例司何也宰
相以道佐人主安用例苟用例則胥吏足矣今為看
詳中書條例司何也惠卿不能對以他語詆光光復
爭曰平民舉錢出息尚能蠹食下戶況縣官督責之

威乎惠卿曰青苗法願取則與之不願不强也光曰
愚民知取償之利不知還債之害非獨縣官不强民
亦不强也昔太宗平河東立糴法時米十錢民樂與
官為市其後物貴而和糴不解遂為河東世世患臣
恐異日之青苗亦猶是也上曰坐倉糴米何如光曰
不便惠卿曰糴米百萬斛則省東南之漕以其錢供
京師光曰東南錢荒而粒米狼戾今不糴米而漕錢
棄其有餘取其所無農末皆病矣侍講吳申起曰光

言至論也光又曰今條例司所為獨安石韓絳惠卿以為是耳豈能獨與此三人共為天下邪上欲用光訪安石安石曰光在高位則異論之人倚以為重今用光是與異論者立赤幟也上竟拜光樞密副使光辭曰陛下所以用臣蓋察其狂直庶有補於國家若徒以祿位榮之而不取其言是以天官私非其人也臣徒以祿位自榮而不能救生民之患是盜竊名器以私其身也今誠能罷制置條例司退還提舉官不

行青苗助役等法雖不用臣臣受賜多矣且青苗之
害乃在十年之外非止今日也夫民之貧富由勤惰
不同惰者常乏故必資於人今出錢貸民而斂其息
富者不願取使者以多散為功一切抑配恐其逋負
必令貧富相保貧者無可償則散而之四方富者不
能去必責使代償數家之負春算秋計展轉日滋貧
者既盡富者亦貧十年之外百姓無復存者矣又盡
散常平錢穀專行青苗它日若思復之將何所取富

室既盡常平已廢加之以師旅因之以饑饉民之羸者必委死溝壑壯者必聚而為盜賊此事之必至者也抗章至七八上使謂曰樞密兵事也不當以他事為辭對曰臣未受命則猶侍從於事無不可言者安石起視事光乃得請遂求去以端明殿學士知永興軍宣撫使下令戍邊光極言公私困敝不可舉事而京兆一路皆內郡繕治非急宣撫之令皆未敢從若乏軍興臣當任其責於是永興獨得免徙知許州趣

入覲不赴請判西京御史臺歸洛自是絕口不論事
而求言詔下光讀之感泣乃復陳六事又移書責宰
相吳充蔡天申為察訪嘗朝謁府獨為設一班光顧
臺吏曰引蔡寺丞歸本班天申窘沮即日行元豐五
年語溫豫作遺表置卧內上嘗指御史大天曰非司
馬光不可又將以為承華師傅蔡確沮之資治通鑑
未就上以為賢於荀悅漢紀數促使終篇賜以賴邸
舊書二千四百卷書成加資政殿學士凡居洛陽十

五年天下以為真宰相田夫野老皆號為司馬相公
婦人孺子亦知其為君實也及赴闕宿衛士望見皆
以手加額曰此司馬相公也所至民遮道聚觀馬至
不得行曰公無歸洛留相天子活百姓宣仁后臨政
遣使問所當先光請開言路詔榜朝堂而大臣設六
語陰箝之光曰此非求諫乃拒諫也人臣惟不言言
則入六事矣乃具論其情改詔行之於是上封者以
千數起光知陳州過闕留為門下侍郎蘇軾自登州

召還緣道人相聚號呼曰寄謝司馬相公母去朝廷
厚自愛以活我是時天下引領拭目以觀新政而議
者但毛舉細事稍塞人言光曰神考之法其善者雖
百世不可變也若安石惠卿所建為天下害者改之
當如揀焚拯溺況今以母改子非子改父衆議甫定
遂罷保甲團教不復置保馬廢市易法所儲物皆鬻
之不取息除民所欠錢京東鐵錢及茶鹽法皆復其
舊或謂光曰熙豐舊臣多儉巧小人他日有以父子

義間上則禍作矣光正色曰天若祚宗社必無此事於是天下釋然曰此神廟本意也元祐元年復得疾詔朝會再拜勿舞蹈時青苗免役將官之法猶在而西戎議未決光嘆曰四患未除吾不瞑目矣折簡與呂公著云光以身付醫以家事付愚子惟國事未有所託今以屬公乃論免役五害乞直降勅罷之諸將兵皆隸州縣軍政委守令通決廢提舉常平司以其事歸轉運提點刑獄邊計以和戎為便謂監司多新

進少年令近臣於郡守中選舉而於通判中舉轉運判官又立十科薦士法皆從之拜尚書左僕射兼門下侍郎免朝覲許乘肩輿三日一入省光不敢當曰不見君不可以視事詔令子康扶入對且曰毋拜遂罷青苗錢復常平糴糴法兩宮虛已以聽遼夏使至必問光起居勅其邊吏曰中國相司馬矣毋輕生事開邊隙光欲以身徇社稷躬親庶務不舍客舉諸葛亮食少事煩以戒光曰死生命也為之益力病革不

復自覺諄諄如夢中語然皆朝廷天下事也九月卒
年六十八宣仁后聞之慟與上即臨其喪明堂禮成
不賀贈太師溫國公祔以一品禮服賻銀絹七千詔
戶部侍郎趙瞻內侍省押班馮宗道護喪歸葬謚曰
文正賜碑曰忠清粹德汴京人罷市往弔鬻衣以致
奠菴哭以過車及奠哭者如哭其私親嶺南封州父
老亦相率具祭都中及四方皆畫像以祀飲食必祝
光孝友忠信恭儉正直居處有法動作有禮在洛時

每往夏縣展墓省其兄旦奉之如嚴父保之如嬰兒
自少至老語未嘗妄自言吾無過人者但平生所為
未嘗有不可對人言者耳誠心自然天下敬信陝洛
間皆化其德有不善曰君實得無知之乎光於物澹
然無所好於學無所不通惟不喜釋老曰其微言不
能出吾書其誕吾不信也洛中有田三頃喪妻賣田
以葬惡衣菲食終其身紹聖初御史周秩首論光誣
謗盡廢其法章惇蔡京請發冢斲棺不許但奪贈謚

仆碑而惇言不已追貶清遠軍節度副使又貶崖州
司戶叅軍徽宗復太子太保蔡京擅政復正議大夫
京撰姦黨碑令郡國皆刻石長安石工安民當鐫字
辭曰民愚人固不知立碑意但司馬相公海內稱其
正直今謂之姦邪民不忍刻也府官欲加罪泣曰被
役不敢辭乞免鐫安民二字恐得罪後世聞者媿之
靖康元年贈謚建炎中配饗哲宗廟庭咸淳三年從
祀孔廟

司馬宣字周卿溫公再從兄父浩贈衛尉卿宣以廕補累官駕部員外郎初為華州司戶叅軍時多滯獄宣為直而釋之及母喪歸釋者炷香於頂泣送之宣履官廉正處事精詳喜愠不形及卒聞者無不嘆惜

司馬旦字伯康池子以父任為秘書省校書郎歷鄭縣主簿有婦蘭訟奪人田家多金錢買吏合為姦旦案之寃者以直井元慶豪欺鄉里擒治於法時旦年尚少人驚服吏捕蝗擾民言蝗民之仇宜聽自捕輸之

官後著為令服除監饒州永平鑄錢監知祁縣天大
旱羣盜剽敗召富家開以禍福爭出粟饑者獲濟舉
監在京百萬倉太原留之通判乾州未行舉監在京
雜物庫知宜興縣獄必窮根株痛繩之民以詆冒為
恥市貫大溪賈昌朝修長橋壞廢歲久勸民葺復不
勞而成守王安石開運河調夫諸縣旦言役大而亟
請令諸縣歲遞一役安石不聽大霖雨民甚苦之役
竟罷歷知梁山軍安州治郡有大體再監鳳翔太平

宮以大中大夫致仕卒年八十二旦澹薄無欲奉養
苟完與弟光尤友愛光居洛旦居夏縣皆有園沼光
歲一往省旦旦亦間至洛視光凡光論天下事旦有
助焉及光被門下侍郎召固辭不拜旦引大義語之
曰生平誦堯舜之道思致其君今時可而違非進退
之正也光乃幡然就位英宗即位入賀恩諸孫未仕
者皆不遣惟遣從兄子稟喜周人急嘗有免官者分
俸濟之其人願以女為妾旦驚謝亟出妻奩中物使

嫁之旦生於丙午與文彥博程公珣席汝言為同年
會賦詩繪像世以為盛事比唐九老子良試將作監
主簿富承議郎陝州通判宏陳留令

司馬里字昭遠溫公再從兄父沂贈尚書都官郎中以
孝謹稱喜賙人而自以惡衣食終其身里第進士龐
籍為廊延經畧使奏通判廊州州將不法里正色力
爭不少假廉靜質直所至有惠政罷官至京師未嘗
有所謁終太常少卿為人孝友寬厚容物而內守勁

直善為詩

司馬富字希道夏縣人旦之仲子善屬文仕為承議郎
通判陝州事

司馬宏夏縣人旦之季子性剛正紹聖黨事起上書論
辯得罪謫永州終陳留令卒死於黨禍

司馬康字公休文正公子幼端謹不妄言笑事父母至
孝博通羣書以明經上第居母憂勺飲不入口者三
日杖而後起見者哀之溫公居洛士之從學者退與

康語未嘗無所得公修通鑑康有助焉公薨執禮如
母喪哀毀過之治喪用禮經得遺恩悉與族人為講
官上疏陳前世治少而亂多及祖宗創業之艱難積
累之勤勞勸君及時向學守天下大器且勸太皇太
后每於禁中訓迪其言切至又言孟子為書最純正
陳王道尤宜觀覽上曰方讀其書尋詔講官節以進
康自居父喪居廬蔬食寢於地遂得腹疾至是不能
朝謁賜優告疾且殆猶力解孟子二卷條具諸所當

言以待曰得一對極言而死無所恨矣使召醫李積
於寃積老矣鄉民聞之皆往告曰百姓受司馬公恩
深今其子病願速往也來者日夜不絕積遂行至則
不可為矣年四十一而卒公卿嗟痛於朝士大夫相
弔於家市井之人無不哀之詔贈右諫議大夫康為
人廉潔口不言財初立溫公神道碑上嘗遣使賜白
金二千兩康以費皆官給辭不受遣家吏入京師納
之乃止范祖禹為誌其墓康子植孫伋伋鎮廣州扈

從高宗南渡遂寓杭

司馬植夏縣人父康卒植幼宣仁后憫之呂大防謂康素以邵伯溫為可托請以伯溫為西京教授以教植伯溫至誨植曰溫公之孫大諫之子賢愚在天下可畏也植聞之力學不懈卒有立於世

司馬京字亢宗溫公再從子父諂為人謹厚孝友自幼無子弟之過贈尚書比部郎中京以廕補累遷駕部員外郎通判潞州事彊直幹敏所至吏民稱之

司馬樸字文季宏子少育於外祖范純仁紹聖黨事起
宏上書論辨得罪純仁責永州疾失明客至必令樸
導以見時方七歲進揖應對如成人以純仁遺恩為
官宏死徒跣負柩還調晉寧軍士曹叅軍轉運使王
似諷樸伺通判過樸不可曰下吏而陷長官人且不
食吾餘似賢而薦之靖康初入為虞部右司員外郎
金人次汴郊命樸使之間樸家世具以告喜曰賢者
之後也待之加禮諭以亟求講解樸復命任事者疑

不決後欽宗思樸言以為兵部侍郎將北還貽書請
存立趙氏金人挾以北去且悉取其孥開封儀曹趙
鼎為匿其長子倬於蜀得免建炎赦至樸私令齎詣
徽宗金憐其忠釋之聞五國城信與朱弁議制服弁
欲先請樸曰為臣子聞此當致其哀尚何請設請而
不許奈何遂服斬哀朝夕哭金義而不問又以金情
實歸報宋因王倫賜樸金倫還言金命樸為行臺左
丞樸辭而止益重之後卒於正定詔稱其忠節顯著

贈兵部尚書謚曰忠潔

司馬桂夏縣人溫公之從孫博學能文仕至司戶叅軍
司馬伋字季思夏縣人溫公曾孫出鎮廣州終開國伯
吏部侍郎所交皆天下名士洪邁輩樂與之遊凡溫
公之書必梓行之於資治通鑑得公凡例於殘稿中
撮其要例傳於世子奪之旨大明高宗南渡扈從寓
杭今為山陰之始祖云

呂圓登夏縣人嘗為僧後以良家子應募捍峭澠李彥

仙保三觜圓登歸之功最多為愛將城垂破以兵來
援身重創持彥仙泣曰圍久不知公安否今得見公
且死無恨方卧聞城陷遽起戰死

司馬夢求夏縣人僑叙州光之後母程歸及門夫死誓
不他適旌曰節婦夢求其族子也取以為後景定三
年舉進士咸淳末調江陵沙市監沙市恃水為防德
祐元年湖水忽涸北兵橫遏中道都統程文亮制置
使高達降夢求朝服望闕再拜自經死

金

劉祖謙字光甫安邑人承安五年進士歷州縣有政迹
拜監察御史以鯁直稱正大初為右司都事除武勝
軍節度副使召為翰林修撰家多藏書金石遺文畧
備父東軒工畫故祖謙以鑒裁自名信筆作簡牘尤
可觀一時名士如雷淵李獻能王渥皆遊其門得人
一詩可傳必殷勤稱道惟恐不聞人以此稱之子敏
仲

段大亨干木之裔早以義氣自豪修幹多力精騎射喜
兵法飲酒至石不亂貞祐末為領軍元帥佩虎符正
大七年以勞進河南諸路軍兵都元帥錫兩虎符壁
竹林堡附者日衆哀宗末引其衆七百人入棗鄉谷
戰死其弟元亨提孤軍守河中元兵誘降不從力竭
城陷就其城西南堞下策馬渡河麾下附馬尾以涉
者衆卒溺死其子宜僧亦戰死元平定後子好謙求
其屍與夫人史氏歸葬先塋

元

察罕西域巴喇勒哈人父布都納徙解州察罕生而魁
偉穎悟博覽強記通諸國字書為行軍府鄂囉千戶
前後從鄂囉齊出入湖廣江西兩省多著勲績大德
四年中書省奏為武昌路治中丞相哈剌哈曰察罕
廉潔固宜居風憲然武昌大郡非斯人不可竟除武
昌後治廣西高仙道之黨計數千察罕止誅首惡數
人餘悉宥之焚其籍事武宗仁宗定大計多所匡益

拜中書參知政事總綱維不屑細務識者謂得大臣
體進榮祿大夫平章政事暮年居德安白雲山別墅
以白雲自號嘗入見帝稱為白雲先生而不名賜姓
白氏察罕性孝友縱奴為民人稱長者子外嘉努大
中大夫武岡路總管呼圖克圖奉直郎高郵府判官孫
九人仕者二人庫庫布哈哈克繖

明

李祐安邑人洪武十三年以儒士授四輔官兼太子賓

客侍食殿庭賜衣三襲後以老致仕

王翰字時舉前夏令仲文子仲文居官以廉稱既致仕
貧不能歸遂為縣人翰少孤鬻薪自給適浚儀歸賜
寓于夏諸名士從之遊翰時時來竊聽賜門人郭極
怪之既知為令子引以見賜遂得受業門下學成後
結廬中條山有所得取落葉書之或風起輒飄澗谷
中樵蘇者得之按節高歌聲震金石洪武間以經明
行修辟為本學訓導改平陸遷鄆陵教諭所至皆有

教法永樂初周王聞其才乞為教授王素驕縱多不法翰數諫不聽因佯狂去久之薦為翰林編修已復以周邸事調廉州教授倭寇數千人破城入率諸生巷戰死之翰性好聚書所得俸錢悉捐以市不足輟衣食費足之故所藏經史子集至數千卷山居時有山林樵唱集在鄢陵有敝帚集在周邸有梁園寓稿子礪字汝用幼嗜學登永樂乙未進士官工部主事遷遼府長史以諫謫蒙陰知縣既歸教授鄉里以老

著有荆南咏聽椿吟稿諸書

杜佑安邑人洪武十四年戶部尚書范敏薦之召為四
輔官佑主春官兼設秋冬禮遇與杜斆同後罷去是
官遂廢不復設佑嘗三主本省布政司鄉試稱得人
薛賓一名貴夏縣人洪武間貢士累官刑部右侍郎建
文嗣位改北平布政司左叅政燕邸有異謀賓同左
布政使張昺密以其狀上擬先發制之小吏季友直
洩其事燕邸謀益亟而賓固不知也適入見被執賓

抗辨不服燕邸以金瓜擊之落其齒遂與曷俱見殺
時有李指揮者匿賓幼子為已嗣後邑人郭成官司
務訐其事因俱罹禍蔓延甚衆

趙班字雲翰夏人徙祥符洪武中舉鄉試入太學使山
東稱旨賜襲衣楮幣尋授兵部職方司主事圖天下
要害阨塞屯戍所宜以進帝以為才遷武庫員外郎
建文初遷浙江右參政策捕海寇有功成祖時使交
趾却其餽擢刑部右侍郎改工部再改禮部進尚書

賜宴華蓋殿仍撤膳羞遺其母尋命詣北京營仁孝
皇后山陵以朝鮮使臣賜賚下獄尋得釋督建隆慶
保安永寧諸州縣撫綏新集民安其業還改兵部尚
書母艱起復專理塞外兵事帝北征轉餉有方仁宗
初改南京刑部尚書宣德五年致仕正統元年卒年
七十三性精敏歷事五朝位列卿自奉如寒素然
蘭芳夏縣人洪武中舉孝廉為刑部員外郎遷郎中永
樂中出為吉安知府寬厚廉潔民甚德之吉水民詣

闕言縣有銀礦遣官覆視父老遮芳訴曰聞宋季嘗有言此者卒以妄得罪芳詰告者得實具奏同官不肯署名芳請獨任之奏上帝曰吾固知妄也事得寢已坐事謫辦事官從宋禮治會通河復為工部主事十年河決陽武遣芳按視芳言中鹽隄當暴流之衝請加築塞又言自中灤分導河流使由故道北入海誠萬世利又言新築岸埽止用草索不能堅久宜編木成大囤貫椿其中實以瓦石復以木橫貫椿表牽

築隄上則殺水固隄之長策也詔悉從之其後築隄者遵用其法以宋禮薦遷工部右侍郎行太僕卿楊砥乞開德州良店東南黃河故道復命芳往治之所經郡邑有不便民者輒疏以聞仁孝皇后將葬治道路供頓訖卒於官

史誠祖解州人洪武末詣闕陳鹽法利弊上納之授汶上知縣為治廉平寬簡永樂七年成祖北巡遣御史考覈郡縣還言誠祖治第一賜璽書勞之曰守令承

流宣化所以安利元元朕統御天下夙夜求賢共圖
治理往往下詢民間皆言苦吏苛急能副朕心者實
鮮爾敦厚老成恪共乃職持身勵志一於廉公平賦
均徭政清訟簡民心悅戴境內稱安方古良吏亦復
何讓特擢爾濟寧知州仍視汶上縣事其益共乃職
慎終如始以永嘉譽欽哉并賜內醢一尊織金紗衣
一襲鈔千貫誠祖既得旌益勤於治土田增闢戶口
繁滋益編戶十四里成祖過汶上欲徙其民數百家

於膠州奏免之屢當遷職輒為民奏留閱二十九年
竟卒於任士民哀號留葬城南歲時奉祀

張隨字子貞芮城人永樂丁酉解元官戶部主事廉介
自持甘清苦宣廟微行幸其第見隨躬親汲水其妻
舂簸甚嘉嘆之後以部事坐法上曰此清主事也勿
問後改工部辭疾乞歸三十餘年清修無異寒士

郭齡夏縣人永樂丁酉舉人授廣安知縣威惠有聲九
載陞重慶知府洞蠻叛逆官軍屢征不下齡毅然請

往諭以朝廷恩信宣慰率衆帖服朝夕侍側不忍舍
留三載臨行餽金萬鎰却弗受時重慶三年不雨齡
回任至界即雨穀秀雙岐人心感悅後陞叅政致仕
兩任俱有去思碑立祠祀焉

李達字九達芮城人永樂庚子舉人任順德府通判會
亢旱去冠服跣足徒步禱雨未及歸大雨饒洽秩滿
陞保定府同知能聲益著後乞歸父母尚康壽鄉人
榮之

李輅安邑人永樂辛丑進士累官山西右布政使廉介恭謹里閤信服學士曾鶴齡嘗稱其為政清而溫惠而直廉而不激寬而不縱時人以為實錄云

裴祥夏縣人永樂間貢任工科給事中初天下驛傳有馬而無驢祥奏為馬數不足用增則傷財病民添設以驢價廉而財省亦足給用文皇可其奏遂命祥巡歷酌處後以言事忤旨上方在疾中調同安知縣疾愈思之取復諫職而祥卒矣

李素安邑人宣德庚戌進士性剛直累擢通政司通政
宦官馬順恃寵而驕素當御前力斥其奸英廟異之
史宗禮字文博解州人誠祖孫宣德壬子舉人狄道知
縣公正廉勤考績陞瑞州府通判遷本府知府剛介
不阿致仕歸瑞州士人千餘保於朝壽八十七卒

張琦安邑人正統戊午舉人授寧陽教諭遷高陵知縣
卒于官琦性剛正面貌蒼古時人以鐵臉稱之居官
廉節恒以孝弟教民歿之日囊無餘資丞欲以庫羨

銀贈琦不受管鑰符籍付丞而卒

王正字嗣宗夏縣人翰孫礪子也幼聰穎過人授千言輒成誦正統壬戌進士兄弟四人析居凡田廬器用悉推讓之授直隸安肅知縣招集流亡民皆復業安肅大治民設主祀之陞大名知府治行卓冠部院識其名於屏母喪歸民遮道泣送服除改知平涼府不畏權勢時韓王驕縱正繩以法事交奏未決適賊火滿之亂撫按檄正督軍餉尋以父喪歸致仕所著有

公餘雅興牧民手鏡藏於家

韓文芮城人景泰庚午舉人知新樂縣七年政簡刑清
修學除蝗賜敕旌獎陞定州知州為民興利除害政
有五瑞四異士民繪圖頌之擢正定府知府

滕浩解州人景泰庚午舉人知泗州剛介輕財不附勢
要有指揮通巡倉御史虛出通關浩皆劾之

郭璿字廷圭夏縣人齡姪景泰庚午舉人陝西臨洮府
同知陞江西南康知府涖官守身一以謙抑長厚為

主初郡多虎害罔反躬自責禱於城隍翌日虎渡江
自死廟下人以為異

毛深夏縣人天順己卯舉人授山東聊城知縣歷陞叅
政聽訟明決吏民莫能遁情所在多善政民為建生
祠立去思碑後祀名宦有臚菴政錄傳於世

馬忱夏縣人天順壬午舉人會試中乙榜任富平清澗
東平三學訓導轉武定州判官在三學視諸生如子
弟貧者供其飲食整窳拔秀造就多方平生勇於為

義親屬貧不能辦婚葬者輒資給之嘗題泰山試心
石曰天君純粹本無侵衆欲交攻乃獸禽若肯嘗存
天理在何勞石上試人心後以子貴封工科給事中
張璉安邑人天順甲申進士官御史按蜀及北畿風采
凜然將抵家望里門而步鄉黨重之以忤權貴出為
郡守子荼舉人官僉事蔓舉人官知府蒞解元官同
知俱有政績為進士

王文解州人成化乙酉舉人幼孤事母以孝聞性沈默

詩文自成一家歷任陝西武功汲縣教諭卓立師模
人材多所成就雖盛暑必衣冠非公事不干謁致仕
杜門不出州守重之常臨訪焉

張岫安邑人知縣琦子成化丙戌進士累官右副都御
史岫侍父高陵有僉事欲辱其父岫挺入與之辨僉
事媿伏及通籍選授御史好善嫉邪以正直著當撫
遼時遼人為御史者將監山西試入謁請其子名蓋
欲登之賢書也即令子稱疾不與試鄰人有驚產者

其子售焉聞之不樂亟命還鄰人固不肯為倍增其直嘗寓書家人欲為其母市絹不足俟領俸鄉人寶之比于魯公之乞米云卒後賜祭葬如例

張翰字文鳳平陸人成化戊子舉人授朝邑教諭敦本崇實訓課有方陞翰林孔目遷侍書與纂修憲宗實錄錫敕命拜檢討侍經筵忤觸權奸左遷重慶同知有惠政郡人勒石紀之陞臨洮知府計息兵變地方賴安劉瑾索賄遂歸總制彭以詩別之有孤忠詆逆

宦萬代播芳名之句瑾怒不已罰米五百石瑾誅獲
免卒年七十五歲

張芮安邑人成化戊戌進士官翰林武宗在青宮芮為
侍讀累遷掌院學士值劉瑾用事威焰薰灼公卿望
塵拜伏芮不為禮瑾銜之誣以他事左遷鎮江同知
後起為太常卿兩乞休不允卒於官賜恤典予淳甫
正德中進士官至主事博閱羣書著有澹泉集裔孫
鄭元布衣道學終身不衰鄉人重其品行以為無忝

金史四庫全書
一百三十一
爾祖云

馬駢字世用夏縣人武定判忱于成化丙午舉人弘治丙辰進士初官行人選工科給事中疏論李廣張鶴齡大為孝廟所賞正德初遷刑科都給事中充戊辰廷試掌卷官大臣焦芳欲子黃中為殿魁駢取呂柟為狀頭有附逆瑾入給諫者駢斥以無恥又自川歸與張綏父同宿館舍不交一言憾作出為淮安推官清獄囚理冤抑贖張生之罪旌何女申婦之烈治行

居第一以瑾怒未釋僅轉松江同知擢知饒州府補
鄖陽府鄖陽山路崎險建議令有罪者修路自贖遂
為坦途又創浮橋葺廢坊修舉廢墜教化大行卒為
忌者所中免官歸騷剛直重信義人有急難輒賑濟
之不少吝如捐金歸楊俊喪代僉事沙立償宿逋者
事非一著有梅軒手簡諸集藏於家

劉良臣字堯卿芮城人弘治辛酉舉人授揚州通判改
陝西平涼府操守清正學問該博歸田後閉戶讀書

金川縣志卷一百三十一
足跡不入城市終其身言動不苟其詩賦至今人傳誦之

張璞字中善夏縣人弘治十五年進士繇歸安知縣召拜御史正德八年出按雲南鎮守中官梁裕貪橫璞裁抑之為所誣逮赴詔獄卒于獄世宗初贈太僕少卿賜祭葬

王濟民字士元平陸人貧而有行正德丁卯舉人授欒城知縣聞母訃哀毀至嘔血服除補河內會世廟入

嗣大統邑夫役不給濟民不呼而集者千餘人太監
錢所過動索千金戒其家人不敢犯中州往多羨賦
濟民悉請罷之廉明正直鄰封有不平輒就質號神
明比奏績冢宰論廉能第一何栢齋叙其德政民為
立生祠祀焉入名宦

劉潮字文淵平陸人純篤力學早負才名正德三年貢
授大興縣丞三年績最進階文林郎陞濟南府通判
雪冤獄禱雨澤却常例服豪強綽有惠政百姓立石

頌德致仕歸絕迹公門不談時事講究經史訓誨後
學士論推重

胡諧安邑人正德庚午舉人初授慶都知縣歷平涼溫
州同知終雲南叅議剛毅有為一塵不染涖官所至
有聲在慶都民皆以胡青天稱之温州柄相不才子
慕友妻艷因醉沈友於水謀納其妻妻訴之當道勢
焰薰赫無敢理者諧曰清平世安得有此事即逮之
獄自是風采大振政績益隆陞叅議致仕家居曾遇

盜於途從者奔散盜窺之曰胡公也為之御至里門叩謝而去巡鹽王諍溫人也極重之檄祀鄉賢祠

劉琬字文翔平陸人濟南通判瀚從弟也幼敏慧力學有大志以名節自砥礪弘治甲子舉人正德辛未登進士第初官行人擢四川道監察御史發宸濠逆謀糾李隆奸狀時稱真御史按甘涼再按畿輔清理山東戎政武宗北巡抗疏請回鑾嘉靖初大禮議起力與張桂爭尋復條時所宜行者十二款蒙嘉納後引

疾歸力田課子冲然自得當時名人如彭澤邊貢呂
柟康海輩皆亟為推重卒時年七十七門人私謚曰
忠毅先生

程鵬解州人正德辛未進士知鄆縣清正自守剛介無
私長安尚書劉璣繪十頌圖美之歷知鄧州刑部郎
中卒於京冢宰王瓊見其囊橐蕭然嘆曰於此知其
守矣為具棺斂之

相世芳安邑人正德甲戌進士歷官刑部郎中沈毅質

直不苟言笑博極羣書詩文雄邁嘉靖甲申廷議大
禮衆論移日未定世芳抗疏直諫畧無避諱傳為首
者棄市衆驚惶無措世芳不動色以身當之旋廷杖
幾斃謫戍延安慨然行伍凡十三年詔還終身無怨
言隆慶初追贈太常寺少卿子邦教舉人

祁鶴安邑人正德甲戌進士歷官清慎不阿嘉靖間青
羊山盜起勢甚猖獗廷議擢鶴兵備特授節鉞鶴相
機搗穴斬數千級御賜金幣褒異及卒上哀惻不已

丘東魯解州人正德丙子舉人授廣平府同知廉明有
幹郡有疑獄十年不決東魯甫下車一言成信讞時
太守忤直指且將按罪小民訛傳兵來驚竄四散太
守遂單騎入奏東魯屹然不動從容曉諭民始安堵
焉歷戶部郎以養親告歸所著有見聞錄

張玫夏縣人正德丙子舉人體貌魁梧自少讀書便以
節槩自高授永清知縣愛民下士癉惡不撓有殺一
家三人者先時屢以賄免玫寘之法又優入臧賢與

政同里獲幸武廟勢凌宰輔政終不許一見其剛介
如此

謝誥安邑人性狷介絕俗正德丁丑進士為孝廉時齊
彥名謀寇運城誥慷慨建議為守城策監臨立鳩夫
增築運城至今賴焉為贛榆知縣值武宗南巡節省
供張民不為厲比歸杜門謝客蕭然如韋布

趙克己夏縣人天性孝友親疾百日不解帶兩艱六載
不御酒肉正德間以貢授靈臺縣訓導諸生有婚喪

不給者分俸助之時邊警甚急令逸去撫按檄署印
旬日措糧萬餘石當道勞之改鄜州學值大饑守巡
擇委賑濟全活甚衆

王繼本字立之夏縣人鯁直嗜學人有過輒面規無隱
前知縣姜洪禮重之後姜巡撫山西鄰士夫有被誣
誤都臺者以金三百賂繼本求為之請拒弗許及貢
赴選銓部授高堂州訓導不受束修以文公家禮化
俗居官七年引疾乞休諸生林棠等保留拂衣歸田

非公不履縣庭事繼母曲盡孝敬所著有虛齋集藏於家

胡志夔字潁南安邑人性聰慧嘗夜遇古碑以手摸之得其點畫即成誦遲明往驗之不差一字嘉靖甲辰成進士知富平縣入為監察御史出按福建當鄉試時冢宰以私人囑峻拒之出為副使督理河道當事將假修築費充大工力阻其議擢延綏巡撫引榆溪水入塞溉田與大將趙岢協力禦敵城保寧寧塞二

堡子承光承裕俱以行誼著孫舜封以解元官上蔡知縣

崔汝孝平陸人嘉靖己酉舉人授樂安知縣摘奸發伏省費開荒歷官戶部員外郎歸里纂修邑志所著有禹貢便蒙行於世

劉鳳朝夏縣人嘉靖己酉舉人體貌魁梧辭氣溫雅授新樂縣知縣浚溝塹植榆柳以禦暴客邑巨盜為地方害前令莫能禁鳳朝擒治之陞戶部主事歷員外

郎管大通橋糧餉監兌小灘隍山東按察司僉事轉
遼東行太僕寺少卿左遷陝西按察司僉事所至有
聲

閻雲望安邑人嘉靖庚戌進士官給事中時倭患孔棘
監軍趙文華藉嚴嵩勢誣逮統兵司馬雲望抗疏乞
收成命否則墮成功滋賊患忤旨謫歸隆慶初追贈
光祿寺少卿

李瑤解州人嘉靖癸丑進士授蒲城知縣明敏質直清

操凜然會地方多盜瑤捕斬渠魁四境寧謐

韓士芮城人嘉靖間貢授博興丞剛介自持盡革常例
民甚德之陞沙河知縣地衝民貧清潔自修比歸老
稚卧轍泣留聲聞數里後復肖像祀之

侯居艮字兼山解州人幼負高才邃於學與兄孝廉居
震齊名弟居坤復同登嘉靖丙辰進士時人稱三鳳
初授淄川知縣清而有為治行居第一擢監察御史
抗疏請止織造又論大學士殷士儋士儋致仕去出

按雲南以人文日起請廣解額如內地論黔國公沐
朝弼不法滇人立祠祀焉居坤字至軒累官太僕寺
少卿甫四旬即解組歸居震子加采進士居艮子加
地居坤子加乘俱舉人

薛一鶚芮城人嘉靖丙辰進士授戶部主事歷官山東
按察司僉事以條陳時事忤當路回籍屢薦不起嘗
曰吾以清白貽子孫足矣與鄉人處和易可挹歿之
日邑無貴賤咸慟惜之

杜璉字汝器平陸人嘉靖辛酉順天經魁壬戌會副孝友正直溫雅博洽授荊門知州興學重農風俗丕變時權貴索沃壤擲書地下曰我割民田以媚權門得罪於天多矣遂掛冠歸民思慕之建生祠祀焉

楊瑄安邑人少孤家貧拾遺金徑還其主事孀母菽水承歡以孝著教諭齊河恥言束修知新安冰蘖自持卒於官囊橐蕭然士民哀之于一魁乙丑進士官尚書加太保孫騰萬厯辛卯舉人
世濟其美

楊一魁字后山安邑人知縣瑄子嘉靖乙丑進士初官
行人擢兵科給事中累遷山東右布政使擢副都御
史巡撫河南遷南京戶部右侍郎總督糧儲晉工部
尚書督理河道時黃淮泛溢漸近陵寢一魁周咨相
度謂黃強由於淮弱黃不分則淮不出陵寢不安請
開武墩黃壩新河使安瀾入海功成加太子少保尋
回京總理部務適經始兩宮土木繁興力為撙節鄭
妃方幸請於乾清宮側建耳殿為奉御所神宗召言

狀一魁奏不敢奉詔京師淫雨城內水壅不行詔拆
毀臨街房屋大璫馮保以已居為屬一魁斥之曰司
禮監顧違朝廷詔書耶考滿加太子太保已而河決
蒙牆忌者遂以蒙牆為黃堦力詆之黃堦蒙牆地分
兩省時隔九年一魁不辨兩疏求去俱蒙旨慰留已
忽傳中旨著革職為民一魁時在朝房即易服策蹇
出都門同列多走餞之不顧也一魁操持峻潔器宇
淵宏位居宮保門庭間寂後熹宗登極蒙恩賜葬諭

祭九壇

鄭茆字茂卿解州人嘉靖間貢賦性質純制行端確歷
鄆陵訓導膚施教諭金州學正口授生徒得俸輒濟
貧乏士多德之致仕歸撫諸姪卹鄉鄰尤摯子國俊
國彥相繼登第人謂盛德之報

劉守字子立平陸人漸孫修髯偉貌沈酣六籍入京與
當代名公結吟壇咸推重之由嘉靖間貢授輝縣訓
導署獲嘉篆興學重農禮賢下士辨冤獄節里甲政

續超卓卒於官檢其行李止餘圖書大府張親為棺殮之聞者惋惜

侯臣字世勲解州人嘉靖間監生中部知縣才識超卓為政務順民心往諸稅並徵鞭撲時聞臣按次以催不刑一人而稅集善惡各有籍記擇其尤者榜於門民風少變以憂去老幼垂泣攀留歷久思不忘補三水吏民畏服如中部創建石門巡檢司并預備倉廩二所

趙欽湯字新盤解州人隆慶二年進士博學淹貫初任
掖縣令以卓異舉擢戶曹出守鳳翔歲荒賑饑兵備
甘州甘俗善畜羊欽湯教以業褐遂貽永利司臬山
東理疑獄多所平反累遷浙轄靖倭亂中貴以織礦
二役滋擾持法不為撓擢南勲卿遷京兆尹會加賦
抗疏止之轉南戶部侍郎總督糧餉酌補餉飭屯政
定改折請蠲恤慎預支凡所條陳悉合機宜久之告
歸卒諭祭葬贈戶部尚書欽湯性孝友初家貧啖糠

覆以粥不令父覺受經仲兄如父師禮待諸姪如子
終身布衣贍助族里無吝色王父家訓有詒者閉戶
不校或投石中其扉碎痕不修存戒子孫欽湯念祖
德不忘日列黑白志善惡置座右年七十九讀書不
輟精字韻著通鑑纂要關公祠志諸書行世祀鄉賢
李瑱字聰甫解州人隆慶戊辰進士孝友性成既仕與
弟珊同居終身一無所私弟卒撫育二姪無異已出
官彰德知府興利除害郡人為立生祠後官陝西叅

政時西郵徵兵關南人心洶洶瑱力為鎮定一方倚
為長城及居鄉溫恭長厚州人稱德門焉

廖永量夏縣人隆慶間貢南鄭主簿陞清澗丞署褒城
沔縣事所至綽有聲望吏民懷之居家日親書所著
有通鑑類抄綱目摘異性理摘言羣書摘粹教家要
畧諸書

司馬祉夏縣人溫公十六世孫與叔晰自南歸夏同登
癸酉舉人晰舉解元祉聯捷甲戌進士授刑部主事

歷官陝西行太僕寺少卿居鄉教授生徒邑內文風為之一變

任養心芮城人萬歷甲戌進士濬縣知縣擢御史按兩淮鹽政條通商恤竈四事迄今為例按湖廣奉詔籍江陵家排浮議存國體又按順天奏治豪貴彈去大帥京師肅然歷陞巡撫江西嚴什伍法而盜息又懲宗人之不軌者以病疏歸所著有中丞奏議子治統庚子舉人道統乙卯舉人姪光統庚子舉人丁未進

士

劉敏寬安邑人萬厯丁丑進士官至兵部尚書總督三邊太子太保賜飛魚蟒玉以軍功廕子錦衣衛指揮世襲卒後進階少保賜祭葬祀名宦祠敏寬長才大畧久歷邊疆所至簡兵蒐乘備糈儲繕城堡自撫至督共計捷三十有奇與諸將吏推心置腹更喜譚道論文榆林人感德立祠祀之

南邦化安邑人萬厯癸未進士澄城知縣歷刑部主事

金石錄卷一百三十一
政治嚴明心存仁恕始立條鞭法大便里甲後人被
德不衰

吳養洵安邑人萬厯戊子舉人任昌平知州秉性耿介
不阿權貴官至西安府同知

王國貞安邑人萬厯己丑進士累官陝西叅政初令壽
光邑濱海多葦租盡捐充邑賦之半守上谷廉明冠
畿輔嚴毅有風節每與時忤及叅秦藩遂有中者而
介終不可易也歸卧林臯猾胥以百金求居間怒叱

之終其身不可干以私

王紀字惟理芮城人萬厯十七年進士授池州推官入
為祠祭主事歷儀制郎二十九年將舉冊立典數遷
延不決紀抗疏極論曰勿持不斷之意叢無影之疑
冬禮成擢光祿少卿引疾去四十一年自太常少卿
擢右僉都御史巡撫保定諸府歲洊饑救荒甚備活
貧民百九萬人稅監張亦請征已捐諸稅紀兩疏力
爭竟取中旨行之紀劾亦抗違詔書沮格成命不報

洎事四年部內肅然遷戶部右侍郎總督漕運兼巡撫鳳陽諸府歲饑賑救如保定四十八年議航漕三十萬石繇淮達遼紀力持不可而颶風覆七十萬石光宗立召拜戶部尚書督倉場天啟二年代黃克纘為刑部尚書因亢直忤中貴削籍朝臣多疏留之後歸角巾野服曰予不幸以大臣行言官事而又不得良愧古人四年卒崇禎初復官贈太子太保謚莊毅紀性嗜書積書盈數屋立朝風節侃侃惟讞遼經撫

獄識者謂吉水誤疆事而紀以司寇主議亦多惜之
謝傅顯安邑人萬厯乙卯舉人授曲陽知縣開渠灌田
五百頃陞大名同知適流寇犯界督衆力戰民獲安
堵署長垣辨獲假巡方齊文舉聲名丕著豫督王家
貞以豫省被寇特疏保陞宛守詰兵措餉著有成績
致仕歸閉門著書子孫科第世濟其美

裴一諫夏縣人唐晉國裴文忠公之後也徙居夏萬厯
間貢事親極孝操行敦篤與真子曹總憲友善以理

學交相勵授中部訓導士風丕變丁內艱歸諸生泣
涕追送不忍舍後補唐山教諭陞山陽知縣地瘠民
貧逋逃甚衆極意招徠流民復歸革紙戶稅革里支
費革收頭陋規日以孝弟事實陰隲錄二書勸諭百
姓療疫賑荒築垣修堤百姓繪像祀之乞歸行李蕭
然著有語錄諸集行世

陰啟光字闇然芮城人父象坤由選貢甲午鄉試歷官
濟南同知啟光萬厯戊午亞魁授山東登州府推官

多所平反清文招遠縣地畝人為立祠祀之陞安州知州子潤由恩貢登甲戌進士歷官左給事中

楊炳安邑人萬厯己未進士授滋陽知縣平妖賊有功行取兵科給事中

丁應觀安邑人萬厯間貢同官教諭修持粹白理學研精所著有學易堂集行世

趙躋昌字昇運解州人天啟辛酉舉人初授介休縣教諭德教為一時最陞咸陽知縣尤著循良闢寇破城

罵賊不屈死

曹于汴字自梁安邑人萬厯十九年舉鄉試第一明年成進士授淮安推官擢吏科給事中疏劾兩京兵部尚書田樂邢玠及雲南巡撫陳用賓樂玠遂引去疏雪吏部郎趙邦清謁告歸僦屋以居不蔽風日起歷刑科左右給事中朝房災請急補闕官修廢政進吏科都給事中極論中官陳永壽罪故事章疏入會極門直達御前至是中官必啟視力請禁之三十八年

典外察明年典京察力持東林議衆不能奪移疾歸
光宗初以太常少卿召改大理少卿遷左僉都御史
佐趙南星京察進左副都御史天啟三年秋副推吏
部右侍郎中旨特用于汴于汴以首推馮從吾名位
先已義不可越四辭不得遂引疾歸明年起南京右
都御史辭不拜石三畏劾為東林領袖遂削奪崇禎
元年召拜左都御史振舉憲規約飭僚吏臺中肅然
與大學士韓爌李標錢龍錫刑部尚書喬允升同定

逆案明年京察忠賢餘黨汰盡溫體仁發錢千秋
科場事以于汴有連并訐之于汴亦發體仁欺罔狀
不聽吏部尚書王永光力薦故御史高捷史塗于汴
惡其人久弗容兩人竟以部疏起官遂日夜謀傾于
汴中書原抱奇劾熿及于汴并及尚書孫居相待侍郎
程啟南府丞魏光緒目為西黨以五人籍山西也工
部主事陸澄源復劾于汴朋奸六罪澄源雖謫于汴
卒謝事去及辭朝以敦大進規七年卒年七十七贈

太子太保于汴篤志正學操履粹白立朝正色不阿
崇獎名教著仰節堂集學者稱真子先生

姚汝明夏縣人天啟元年舉於鄉性孝友崇禎間歲大
歉傾廩賑濟立義冢瘞暴骸授蠡縣知縣歲饑惠政
甚備聞鄉邑又饑貽書其子令賑救如初遷河間府
同知十五年閏十月偕妾任氏殉之贈僉事

任裕統芮城人養心姪天啟辛酉舉人初署閩鄉儒學
教諭有畫策保城之功人為刻石頌德陞國子監學

錄歷司務南刑部主事郎中出為南康知府任刑曹
時力釋張名士疑獄南部咸服其識至南康重修書
院作人賑饑一郡為之尸祝

王國訓字振之解州人天啟二年進士歷知金鄉壽張
滋陽武清俱有惠政崇禎四年坐大計免久之補調
扶風國訓性剛嚴恥干進故官久不遷八年秋賊來
犯嬰城固守閱兩月外援不至城陷罵賊死贈光祿
少卿賜祭葬廕一子入監

李貞佐字無欲安邑人受業曹于汴之門以學行著天啟七年舉於鄉崇禎十四年除郟縣知縣土寇楊同錦餘黨聚焦家寨貞佐練鄉兵括賊財充餉時出郊勞耕者酒食月必課士邑姊妹二人抗賊死拜其冢祀以少牢民王錫行有行誼造廬禮之士民大悅明年二月李自成來寇貞佐集衆死守城陷走拜其母曰兒不忠不孝陷母至此有勸微服遁者不可賊執之去大罵見殺人厲聲曰驅百姓困守我也妄殺何

為賊割其舌支解而死母喬亦死友人王昱相隨不
去賊義之昱收葬貞佐於南郊每歲寒食鄉人傾邑
祭奠廣其塚至二畝餘贈河南僉事

王國楠安邑人天啟丁卯舉人官至監察御史四歲亡
父事孀母侍膳問寢終身如一日兩任殘邑創立甌
城涖臺中出巡江南沿海肅清

李恪安邑人僉事圭孫也生有異質博極羣書詩學字
韻尤稱專家崇禎甲戌進士累官山東僉事備兵兗

西受命後見國事日非慷慨自誓卒以身殉

靳斗安邑人歲貢官山東陽信教諭崇禎癸未城陷罵賊不屈死孫麟衍麟振赴井死僕薛國興張引自刎死合門殉難凡九人斗子儀需諸生號泣奔喪覓屍負歸

盧學古夏縣人舉於鄉授衡水知縣遷承天府同知攝荆門州事崇禎十五年十二月李自成寇荆門學古誓死守賊環攻四日無援城陷學古罵賊不絕口剖

腹而死

李唐舉人令任縣城陷死之

陳懔芮城人恩貢任景州判遷東城兵馬司逆闖陷京師死之

孫維藩解州人崇禎間貢任長安教諭介直不阿會宗生與饒生沈孔明競貢宗暮夜以黃金百饋維藩欲為之地維藩拒誓不右宗左沈一時士人咸欽服云

國朝

郭連城號笑瀛平陸人弱冠登鄉薦酷嗜古學為孝廉
二十年捷南宮房師倪鴻寶極賞之授江南太平司
李分校棘闈所得皆知名士因剛介忤直指遂坐貶
不復出順治二年起廢門人居銓諫者議補部員力
辭養親間居著述人甚重之

李肯字元仲解州人前戊午舉人雄偉有岍峩聲如洪
鐘初知孟縣調良鄉擢山海道

國初起濟寧道闖變後賊猶未盡平肯勵將士擒獲輒

金史卷一百三十一
盡法治之賊忿甚一日伺肯出伏黨數十人於路猝
出擊之左右胥駭散因被執脇以利刃不為動大罵
不屈遂遇害事聞

贈光祿寺卿廕子樞入監

馬迪吉夏縣人前壬午舉人

國初知鄧州修葺城池撫循戶口流民多復業流賊劉
二虎犯境衆數萬掩城迪吉誓死守城中殺牛畜為
食撤屋為薪人無異志賊計窮遁去以功陞治中卒

丁期昌字歷初安邑人前癸未進士

國初授揚州推官調黃州精律例多所平反舉廉官第一尋以吳直指蜚語罷歸教子弟讀書三十年不出門外衣大布衣食脫粟飯周貧乏無德色鄉人重之
著評注唐詩藏於家

侯佐解州人知建平合肥有循賢聲擢刑部主事調吏部順治己丑遇賊拷掠罵賊不屈與父嗣晉偕被害
李忱字恂九安邑人順治戊子拔貢吏事明敏授西安

金匱要略卷之四十一
縣知縣詳請協解溫處軍需撥府支銷雨傷稼請蠲
田租之半民鄭為盜所誣雜鄭衆人中令辨之亟譌
釋鄭論盜如法舉卓異

賜袍領旌之遷鞏昌府同知擢金華知府節宴飲省刑罰
閩逆之亂嚴守孤城四十五日夜營無一卒城無一
兵卒獲保全以勞卒

薛佩玉芮城人順治辛丑進士授貴州都勻縣知縣逆
藩之變死其官佩玉少讀書至古人忠孝大節神輒

躍都勻以衛初改縣彈慮整飭甫期年變作縣駐防
兵數千譁譟焚掠佩玉登城呼首領諭令解甲聽命
賊不應擁佩玉歸署以健卒守之已而投偽印令知
縣事佩玉抗節不屈北向再拜曰臣不能討賊又不
能守土奚敢偷生遂登樓自縊以死

張潤民字膏之號敬齋夏縣人康熙丙午丁未聯雋進
士授內閣撰文中書舍人歷戶禮兩部員外郎郎中
出為河南督學道僉事考滿以叅議候補卒於家潤

民性醇謹而執守殊慤奉父母以孝聞朔望必祭祭必泣事兄濟民恭甚嘗為著學喫虧先生傳在京邸恒徒步間騎蹇驢下直則蕭然授徒如諸生時同官賈鳴璽嘗賦詩曰退食曾聞仍設帳趨朝近見但騎驢為郎同考會試權貴人屬子弟得其卷塗抹如老樹槎枒魏敏果公聞之詣其廬為拜於堂下及視學政侶侶克舉其職嘗拆童子號久不至已而提調某潜使人來請易蓋有所挾也潤民大怒坐堂上寘利

刀案間以令旗召之曰吾且以頸血濺若衣某大懼
再三謝罪乃解豫人謂公而克明為學政最

王尹方字鶴汀安邑人斌子壬子癸丑聯雋進士繇翰
林院庶吉士累官內閣學士兼禮部侍郎雅度清望
焜耀班行一時有四君子之目嘗夜

召至禁中講經書敷繹詳剴為講臣最主庚午江南鄉試
疏請破例搜落卷得

旨特為展期校閱率至丁夜事訖嘔血數升得人之盛論

者謂自明崇禎庚午西江姜公燕及典南闈試盡收才望士越六十年而復至庚午其甄拔耆雋適符云性至孝生母歿以嫡母年高具疏請終養生母故不慊於嫡母者也君子以為厚卒

賜祭葬

介孝璿字衡玉解州人給事松年子康熙丙子舉人知浙江海鹽縣甫九月遽卒於官孝璿承家學嗜讀書以閎博聞既舉於鄉益日夜探討不輟嘗網羅州境

暨隸縣典實排績成書而田賦鹽政利弊尤覈論者
謂其博而能約得史家遺法比筮仕亦能以經術飾
吏治晉人胥重之



山西通志卷一百三十一